

1. UVOD

Evropa je kroz historiju bila simbol traženja smisla postojanja i usavršavanja sistema života i odnosa sa drugima. Evropa je bila nešto dragocjeno, dio onih koji je traže, vrijedno i važno za njih. U tom traganju za evropom, do tada samo prazni prostori dobivaju novi životni sadržaj, postaju prostorom smisla ljudskog življenja, napretka, sistema života i odnosa, promjena koje se događaju ljudima, historije ljudskog postojanja.

Svi oblici integracija država na tlu Evrope bili su u cilju stvaranja boljih uslova za život. Tako je evropska unija, preko nekoliko integracija, postala cilj kojem teže sve države u Evropi pa i BiH. Kroz ovaj rad pokušat ću prikazati put kojim je stvorena Evropska unija sa posebnim osvrtom na našu državu.

U drugom dijelu rada govorim o značaju Dejtona i Brisela za Bosnu i Hercegovinu, te o izlasku Bosne i Hercegovine iz faze upravljanja krizom i ulaska u fazu tranzicije. Ovaj dio je također posvećen i svim evropskim inicijativama nakon potpisivanja Dejtonskog sporazuma te efektima koje su one izazvale u Bosni i Hercegovini i regionu. Objasnjavam i učešće Bosne i Hercegovine u evropskim integracijama, ostvarene rezultate, te aktuelne probleme na tom putu. Posebna pažnja je posvećena parafiranju Sporazuma o stabilizaciji i pridruživanju, detaljno su prikazani svi koraci na putu do punopravnog članstva, te dinamika približavanja Bosne i Hercegovine Evropskoj uniji. Također su analizirane moguće prepreke i izazovi na putu ka Briselu.

Dalje, analizirani su ekonomski i politički kriteriji koje BiH treba ispuniti kako bi pristupila Evropskoj uniji. Kroz analizu tranzicijskih indikatora, kriterija konvergencije i političkih pokazatelja, pokušat ću dati ocjenu makroekonomske i političke situacije zemlje i predvidjeti neophodne korake koje BiH treba poduzeti da bi zadovoljila uslove za njeno učlanjenje u EU.

Prve asocijacije na pomen EU-a su kvalitetniji život, bolji standard, mogućnost putovanja. Iako dominiraju pozitivne asocijacije, negativne također pokazuju izvjesnu izdržljivost: nepovjerenje, stalni ultimatum i previsoki zahtjevi.

Prvi konkretni efekti Sporazuma o stabilizaciji i pridruživanju BiH sa EU osjetiće se tek polovinom ove godine kada bi ovaj dokument trebao da bude i zvanično potpisan. Parafiranje je samo otvorilo vrata za pristup evropskim fondovima, viznim olakšicama, liberalnijem tržištu i primjeni standarda EU u obrazovnom sistemu BiH.